

Yonta yu ilimale 1 Yon 1 Yon buka ya: dulu koko

Elemala natilalo sotapo sos hapuloma dla imsiyamama Yesuye oplami moto hame ta:lamu dla posela:na demsiyamaio. Epame yia:ta imale dulu dla batalimale koko halowe ye pokoko demsiyamdiyo. Epame ya:mkale bokotiyapo malamolowe mape pokoko demdiyo. Yia:tapo ipapele imale hamsiyamalati Yesu ya: alotle tlalo oplami hale Yontapo mo-totoyemala halemama koko i natipame yu ilimale iye sos hapuloma dla halopimtaiyo. Adipalati, Yon posolotamaio, mikadepe dle so sos hapuloma dla ha:ha:tapo ma elemala natilalo sota imale dla tullala depame. Amasiyama ya: solotamaio, yia:tapo ka:yapa Keliso koko dalepo hamuwa koko tlo sikemte kikitilata hamame ha:ha:mama yimkadulo ma sikemte bokotiyapo malamha:ha:lepo depame.

Yesuye Pasakalo Hapilalo Yupu

¹ Ditapo wua: watle Pasakalo Hapilalo Yu kokoye il-ima. Eye ka:yapa kotiyamale sitali ikadepe dla ya:ye haluwapo. Di ya: kokoye dalepame di inomata ya:ye natiwapo. Epame di do mate ya:ye umuwapo. ² Pasakalo eta haliyamale dla botomastlati di natiwapo. Epapedeme dita ya: natideme dita ya: kokoye haliyamale dla botomas-tepo atlamsiyamapo. Epedeme ya:ye ka:yapa A God mate haluwapo. Epame dia: watle haliyamale dla botomas-tauwapo. Epapedeme ya: dla kokó elepo ellalo pasakalo elapo. ³ Epedeme dita dalepame natiwa kokoye wua: watle atlema, wua:tapo dia: mate hatlope dlepo depame.

Adipalati, dia:ye A God mate Yami Yesu Keliso mate hatlope depo ha:ha:po. ⁴ Epapedeme ditapo koko hema wua: mate dia: mate siyele pato ta:dlowedeme yu iye ilipo hamima.

Godye hela:dlepo

⁵ Epedeme dita Keliso tle daluwa kokoye ma wua: watle botomasta ipo. Eye, Godye hela:dlepo. Ya: dla amtuwale hale pe-elasema. ⁶ Epapele dulu dla dita atlemama, “Di God mate hatlope demde,” depame ma amtuwale dulu dla me-siyamelepiye, dia:ye isikimi mala-atlapo. Epapele koko tle dia: dla ikadepe kokota pe-elasema. ⁷ Amasiyama Godta hela:dle dulu dla halaye, epammama di ma hela:dle dulu dla ha:ha:lepiye, eta di mikadepe dle so hapulomaye hatlope depo ha:ha:mama apelepe. Epapalati Yami Yesu omalitapo di bobtalimale hapulomaye howahapame hiyostlepe.

⁸ Epele dulu dla dita atlemama, “Di bobtalimale pa:talo so,” dlepiye, di diskamu ikadepe koko tle ma alikili dla elemtulupo. Epedeme dia: dla ikadepe kokoye hawa. ⁹ Amasiyama epapele dulu dla dita di bobtalimaleye God dla bobotimatimelepiye, ya:tapo di bobtalimale hapulomaye howahapo wellipe. Adipalati, ya:tapo ya: yu itiyapo himili e dolumama woloma ikadepe koko tlo halepe. ¹⁰ Epame dita atlemama, “Di bobtalimale koko pohalomasemde,” dlepiye, di Godye isikimi mala-atlalo oplami demama apelepe. Epapele tle God yuta di dupa dulu dla pe-ellowa.

2

Kelisoye di gadlalopo

¹ Na: mamadulo namkadulo, wua:tapo batalimale koko dulu dla tutula:lala depame yu ilimale iye wua: watle hamima. Amasiyama wua: dulu dla haleta batalimale

koko dulu dla tullupiye, wua: malamaiya, oplami hale-tapo dia: tiyama tle halemama God dla dia: yilo otele himhalapo, eye ka:dle oplami Yesu Kelisopo. ² Epedeme Kelisota di batalimale dla pomama Godta kasilamaleye mo-pustauwapo. Amasiyama hatlo di batalimale yilo po-apena, hao, ta:la so hapuloma yia: bobtalimale yilo apuwapo.

³ Epame dita Godta molo atlale yu dla salladepo siyamelepiye, eta dita ya:ye mikadepe dle kokoye nati-imama apelepe. ⁴ Amasiyama oplami haletapo atlemama, “Godye na:malamana,” depame ma ya:ta molo atlale yuye podolumalalo sela:lepiye, ya:ye isikimi mala-atlemama apelepe. Epedeme epapele oplami dla ikadepe kokoye hawapo. ⁵ Amasiyama oplami antapo Godta molo atlale yu dla salladepo sela:lepiye, epapele oplamitapo ya: dupa dulu tle God sikemte malamolowe kokoye pato elapo. Epame di ipapele koko tle dita ikadepe God mate hatlope dle kokoye malamdepo. ⁶ Eye, oplami haleta atlemama, “Na: God mate hatlope depo halema,” dlepiye, ka:dena, epapele oplamitapo Yesuta haluwa pasakalo epapele some hallepe.

⁷ Namkadulo, na:ta wua: watile molo atlale yu ilipo hami iye po-amko. Amasiyama wua:ta ka:yapa mikadepe depame molo atlale yu hamuwaye e ipo. Adipalati, molo atlale yu takala iye wua:ta ka:yapa ma-daluwapo. ⁸ Epapele tlope molo atlale yu takala hema amko kokoye me-elapo. Adipalati, amko koko ikadepeye Keliso dulu dla epame wua: dulu dla nati-ipo. Epapele koko tle amtuwaleta mo-pa:mtlati hela:dleta mo-dompuapo.

⁹ Oplami antapo ya:skamu ya:ye hela:dle dulu dla halema depame ya:mkale mikadepe dle oplamiye elle mate hallepiye, ya: ala amtuwale dulu dla halapo.

¹⁰ Amasiyama oplami antapo ya:mkadulo mikadepe

dle soye bokotiyapo malamhallepiye, ya:ye hela:dle dulu dla halapo. Epedeme hela:dle dulu edla ya:ta batalimale dla tullupo depame kustame tlowe alisisiye hawapo. ¹¹ Epapedeme dulu edla oplami antapo ya:mkale mikadepe dle oplamiye elle mate hallepiye, ya:ye amtuwale dulu dla halapo. Ya: amtuwale dulu dla sela:mama ya:ta ta apiye ponatisema. Adipalati, amtuwale kokotapo ya: inomaye me-hihimamuwapo.

¹² Epedeme na: mamadulo, na: wua: watle yu ilimale iye hamima. Adipalati, wua: bobtalimaleye Keliso hi tle me-hihiyoluwapo. ¹³ Epame adulo, yu ilimale i ma wua: dla hamima. Adipalati, ka:yapa kotiyamale sitali tle haluwa oplami Kelisoye mo-wua:malamana. Epo ma amkoteta:le so, wua: dla yu ilimale iye hamima. Adipalati, wua:tapo batalimale oplami Saitenye ma-tla:mtame ha:ha:po. Epame na: mamadulo, na: ma wua: dla yu ilimale iye hamima. Adipalati, wua: di Aye mo-wua:malamana. ¹⁴ Epame adulo yu ilimale i ma wua: dla hamima. Adipalati, ka:yapa kotiyamale sitali tle haluwa oplami Kelisoye mo-wua:malamana. Epo ma amkoteta:le so wua: dla yu ilimale iye hamima. Adipalati, wua:ye itiyamale sopo. Epame God yuta wua: dulu dla ellati wua:tapo batalimale oplami Saitenye ma-tla:mtame ha:ha:po.

Ta:lamo koko dla sikemte solotamolowe

¹⁵ Epedeme wua: ta:lamo koko mate epame ya:ta halopo pua alisisi hapuloma mate ase sikemte solotamiya. Oplamitapo ta:lamo koko dla sikemte solotapo hallepiye, ya: dupa dulu dla A God malamolowe ye ikadepe hawa halapo. ¹⁶ Epapedeme ta:lamo sikemte solotamale koko tle ipapele kokota woyamelepe. Mota solotamolowe koko, epo ta:lamota halopo pua alisisi tlapame sikemte solotamolowe koko, epame alisisi pasatepo halemama ya:skamu di dla hamhetlowe koko. Epele tlope koko hapuloma

iyē A God tle popuasema, amasiyama ta:lamota halopo pua kokopo. ¹⁷ Epedeme ta:lamo koko mate epo ya:ta halopo pua koko hapuloma mate pa:lepe. Amasiyama Godta solotamale koko halomalalo so tlo kokó ha:ha:po ha:ha:lepe.

Keliso dla humatlalo oplami

¹⁸ Na: mamadulo wua: daliya. Mosukulu alilaye mo-mateka:pi halapo. Epedeme Keliso dla humatlalo oplamita puluwe kokoye wua: watle ma-atlamuwapo. Amasiyama Keliso dla humatlalo so opiye wata mo-wowoyapo siyamapo. Di epapele koko tle malanatipo, mosukulu alilaye mo-mateka:pi puapo depo. ¹⁹ Amasiyama opa iwoloye ka:yapa dia: mate hatlope depo siyapame ma di salepo tauwapo. Adipalati, yia:ye ikadepe dia: mate hatlope depo poha:ha:na. Yia:ta dia: mate ikadepe hatlope depo ha:ha:leta ammatiye, eta di posalepo tama. Amasiyama yia:ta di salepo tauwa eta ikadepe yia:ta dia: mate pohatlope dle kokoye botomastauwapo.

²⁰ Amasiyama wua:ye Kelisotapo Hela:dle Sokoye wua: dla mo-olostauwapo. Epapele koko tle wua:ta hapuloma ikadepe kokoye mo-wua:malamana. ²¹ Epedeme na:ta wua: dla ilima koko iye wua:ta ikadepe kokoye yeitapo ha:ha:lata po-aposema. Amasiyama ikadepe kokoye mo-wua:malamana. Adipalati, ikadepe koko dulu dla mala-atlowe koko pe-elasema.

²² Epapele dulu dla anaye isikimi mala-atlalo oplami demdi? Eye oplami antapo Yesuye po-Keliso dlalo halema:, epapele oplamiye isikimi mala-atlalo oplami demdepo. Epedeme ya:tapo Keliso dla humatlalo oplami halapo. Adipalati, ya:tapo A God mate Yami mate dla pokoko desemde. ²³ Epapedeme oplami antapo God Yami

Yesuye pokoko demhalema:, ya: dulu dla A God ma pohalasma. Amasiyama oplami antapo God Yami Yesuye ya: dupa dulu dla ma-hamuwa, ya: A God ma ma-hamuwapo.

²⁴ Epedeme ka:dlepo, wua:ta ka:yapa ka:dle yu hauwa eta wua: dupa dulu dla kokó elloweye. Epapele dulu dla yu eta wua: dulu dla kokó ellepiye, eta A God mate epo Yami mateta wua: mate hatlope depo hallepe. ²⁵ Epalati Keliso meyelo di watle kokó elepo ellalo pasakalo hamilowedeme yu itiyapo himiwaye hamilipe.

²⁶ Epapedeme opa opitapo biskapa imale koko hamsiyamalati na:tapo wua: watle yia: kokoye ilipo hamima.

²⁷ Adipalati, wua: dla Kelisota ya: Hela:dle Sokoye molostauwapo. Epedeme Hela:dle Soko eta wua:ye imalalo hallati wua: ma posolotamasema oplami haleta wua:ye imoloweye. Ame adipalati, Hela:dle Soko etapo wua:ye ikadepe koko hapuloma me-imhalapo. Epedeme ya:ta imale dulu dla isikimi ikadepe koko siyapo tlo imhalemama isikimi mala-atlale koko po-imhalasema. Epapedeme wua: Keliso dulu medla mepo ha:ha:iya.

God ya: akimlala

²⁸ Epapedeme na: mamadulo, wua: Keliso dulu dla mepo ha:ha:iya. Epelepiye, wua:tapo ya:ta puale oloma edla ya: mila:pi tle itiyamale mate wowota:le pa:po ha:ha:lepe.

²⁹ Di Godye isikimi ka:ka:dle koko tlo halomhalemde dlepiye, eta di malamelepe, ka:ka:dle koko halomalalo soye God ya: akimlalapo.

3

¹ Di A Godta dia:ye sikemte bokotiyapo malamuwaye woloma malamaiya. Ya:ta bokotiyapo malamale tle dia:ye ya:tapo ya: akimlala demdepo. Epapedeme dia:ye ikadepe ya: akimlala depo ha:ha:po. Epapele koko tle ta:lamu

solotamalalo sotapo di kokoye poyia:malamana. Adipalati, yia:ye God koko poyia:malamana. ² Epedeme namkadulo, di watapo God ya: akimlala depo ha:ha:po. Amasiyama di ala podimalamana, dita alotle adipo ha:ha:pa: dle kokoye. Epapele tlope dimalamana, Kelisota pulupiye, di ma ya: some ha:ha:lepe. Adipalati, ditapo ya: mila:pi ikadepeye natilipe. ³ Epedeme koko hema opa anawolotapo dalemha:ha:mama omha:ha:ma:, ka:dena, yia:ta ullu pa:po Keliso some ha:ha:loweye.

⁴ Oplami antapo batalimale dulu dla sela:ma:, ya:tapo Godta aiyalma hatitimaleye hauwokokomhalapo. Adipalati, batalimale kokotapo aiyalma hauwokokomhalapo. ⁵ Wua: mo-wua:malamana, Kelisota puwaye opa hapuloma batalimaleye howahapo welilowedeme puwapo. Adipalati, ya: dla batalimale hale hawa. ⁶ Oplami antapo Keliso dulu dla halema:, ya: matle batalimale koko dulu dla posela:lowa. Amasiyama oplami antapo batalimale koko dulu medla sela:ma:, ya:ye Keliso kokoye woloma natipame pomalamana.

⁷ Na: mamadulo namkadulo, wua: wolomape, opa opita imale tle wua:ye alikili dla elemtulu demiya. Ka:ka:dle koko tlo halomhallalo oplamiye, ya: God mila:pi tle ka:dle oplami depo halapo. Epedeme ya:tapo Kelisota God mila:pi tle ka:dle oplami depo halaye ya: ma epo hallepe. ⁸ Amasiyama oplami antapo batalimale koko dulu dla sela:lepiye, ya:ye Saiten ya: oplamipo. Adipalati, Saitenye ka:yapa kotiyamama batalimale oplami depo haluwata ala me-halapo. Epapele koko tle God Yamita Saiten ya: oko yumuluwedeme puwapo.

⁹ Epedeme opa anawolotapo mo-God ya: akimlala depo ha:ha:ma:, yia: matle batalimale koko dulu dla posiyamolowa. Adipalati, Godta hallalo pasakalo ikadepeye yia: dulu dla halapo. Epedeme yia:tapo ma

batalimale koko dulu dla siyamolowe ye po-ala:lowa.
¹⁰ Epapedeme ipapele koko tle ditapo God ya: akimlala mate Saiten ya: akimlala mate malanatimha:ha:po. Oplami antapo ka:ka:dle koko pahalomalalo halemama ya:mkale mikadepe dle oplamiye pobokotiyapo malamalalo hallepiye, ya:ye po-God yami.

Ya:mkale sikemte bokotiyapo malamolowe

¹¹ Wua:ta ka:yapa imale koko daluwaye ipo. Ka:dena, dita hapulomatapo ya:mkale asiyama bokotiyapo malama ya:mkale asiyama bokotiyapo malama demha:ha:loweye.

¹² Wua:ye ipapele koko dulu dla ha:ha:mama Kein some ha:ha:miya. Adipalati, ya:ye Saiten yu dla salladepo sela:mama ya: ei yumuwapo. Epedeme wua: natiya, adipalati Keinta ya: ei yumuwa? Eye ya: natiwapo, ya:ta koko halomhalale hapulomaye bobtalimale siyapo. Amasiyama ya: eita koko halomhalale hapulomaye isikimi ka:ka:dle siyapo. ¹³ Ipapele koko tle wua: malamelepe, ta:la sotapo wua: dla elle pato himilipiye, ase sikemte malamiya.

¹⁴ Di dita diamkadulo mikadepe dle soye bokotiyapo malamha:ha: koko tle ditapo polowe tle ma pasakalo dla ulumtame ha:ha:ye natipo. Oplami antapo ya: dla ya:mkale bokotiyapo malamale hawa hallepiye, ya:ye ala polowe dulu dla me-halapo. ¹⁵ Oplami antapo ya:mkale mikadepe dle oplami dla elle mate hallepiye, ya:ye ya:mkale yumulalo oplamipo. Epapedeme wua: mo-wua:malamana, oplami antapo ya:mkale yumulalo hallepiye, ya: dulu dla halepo halepo pasakalo hawa halapo.

¹⁶ Epapedeme di ipapele koko tle ikadepe bokotiyapo malamolowe kokoye malamapo. Yesu Kelisotapo dia: yilo ya: pasakaloye polowe dla himiwapo. Epedeme di

ma ka:dena, dita diamkadulo mikadepe dle so yilo di pasakaloye alikili dla hatitimoloweye. ¹⁷ Epapedeme oplami hale alisisi pasataletapo ya:mkale mikadepe dle oplami alisisi pa:le hallati natipame ya: gadlowe allipiye, ya: dupa dulu dla God sikemte malamaleyeye hawa ikadepepo. ¹⁸ Na: mamadulo namkadulo, poka:dena, ditapo isikimi di mati tle ya:mkale bokotiyapo malamolowe kokoye atlamha:ha:loweye. Amasiyama ka:dena, ditapo ya:mkale bokotiyapo malamolowe koko ikadepeye moto mate nati-imha:ha:loweye.

God mila:pi tle wota:le pa:po itiyamale mate ha:ha:lowe

¹⁹⁻²⁰ Di diamkaduloye ikadepe sikemte bokotiyapo malamha:ha:lepiye, eta dita ikadepe God ya: akimlala depo ha:ha:ye malamelepe. Amasiyama dita ikadepe God ya: akimlala depo ha:ha: dulu dla di dupa malamaleta di bobtalimaleyeye nati-ilipiye, di koko edla powowota:lowa. Amasiyama di mepele God mila:pi tle wowota:le pa:po itiyamale mate ha:ha:lowepo. Adipalati, Godta pato hale-mama di dupa dulu malamaleyeye tla:mtamhalemama koko hapulomaye malastepo halapo.

²¹ Epapedeme mikadepe dle so namkadulo, di dupa dulu malamaleta dia:ye pobatalimale so dlepiye, eta di wowota:le pa:po God mila:pi tle ha:ha:lowepo. ²² Epele dulu dla di apa kokoye ya: dla atlanatiliipiye, di koko eye ya: tle halepe. Adipalati, ditapo ya:ta molo atlale yu dolumha:ha:mama ya:ta solotamale koko halomha:ha:po. ²³ Epedeme ya:ta molo atlale yuta ipo atlapo, “Wua: God Yami Yesu Keliso hi dla mikadepe diya. Epame ya:ta imale dolumama ya:mkale asiyama bokotiyapo malama ya:mkale asiyama bokotiyapo malama demha:ha:iya,” depo. ²⁴ Opa anawolotapo Godta molo atlale yu dolumha:ha:ma:, yia:ye ya: mate hatlope depo ha:ha:po.

Epame asiyama ya:ye yia: mate hatlope depo halapo. Di ma dimalamana, Godye dia: mate hatlope depo halapo. Adipalati, ya:tapo ya: Hela:dle Sokoye di watle hamiwapo.

4

Imale hapulomaye heheletimala natiya

¹ Mikadepe dle so namkadulo, wua: wolomape! Adipalati, biskapa God yu molo atlamalalo so hapuloma watapo ta:lamo pato dla ma-siyamapo. Epedeme oplami haleta puame wua: dla atlemama, “Na:ta imale koko hamsela: iye Soko tle puma,” dlati wua: yipta ya: yu dalepame ya: dla tulumiyu. Amasiyama wua: ya:ta imale hamsela:ye ikadepe God tle puma: depame ya:ye woloma heheletimelepe. ² Amasiyama wua: yia:ta imale dulu dla God ya: Soko kokoye ipo malanatilipe. Yia:ta imaleta atlemama, Yesuye God tle malame oplami moto hame ta:lamo hema haluwa, dlepiye, eta yia:ta imale kokoye ikadepe God tle puapo. ³ Amasiyama oplami antapo ipapele kokoye po-imalalo wekelepiye, ya:ta imale kokoye God tle popuasema. Ipapele oplami dupa dulu dla Keliso dla humatlalo soko halapo. Keliso dla humatlalo sokoye ta:lamo pato dla pulupe dlati wua:ta dalemha:ha:uwaye, eta wata mo-puame halapo.

⁴ Na: mamadulo namkadulo, epapele tlope wua:ye God ya: akimlala ikadepepo. Epedeme wua:tapo biskapa God yu molo atlamalalo sota imale dalepame yia: yu dla potullalo wekuwata wua:ta yia:ye ma-tla:mtauwapo. Adipalati, wua: dulu dla Soko halata itiyamaletapo ta:lamo so dulu dla soko hala itiyamaleye ma-tla:mtame halapo. ⁵ Biskapa God yu molo atlamalalo so iwoloye ta:lamo sopo. Epedeme yia: alila hapuloma ta:lamo koko tlo esemsiyamapo. Epalati ta:lamo sota yia: yu dla sikemte dalemha:ha:po. ⁶ Amasiyama di God ya:

opa depo ha:ha:po. Epedeme God ya: opa ikadepetapo di yu dalemdepo. Amasiyama po-God ya: opatapo di yuye podalesemde. Ipapele koko tle ditapo ikadepe koko imalalo soko mate isikimi elemala natili koko tle imalalo soko mate malanatimdepo.

Godye sikemte bokotiyapo malamalalo halapo

⁷ Mikadepe dle so namkadulo, ka:dena, dita hapulomatapo ya:mkale asiyama bokotiyapo malama asiyama bokotiyapo malama demha:ha:loweye. Adipalati, bokotiyapo malamale kokoye God tle puapo. Epedeme oplami antapo ya:mkale bokotiyapo malamhalema:, ya:ye God ya: maseyemalapo, epame ya:ye God kokoye ya:malamana. ⁸ Amasiyama oplami antapo ya:mkale pobokotiyapo malamalalo halema:, ya:ye God poya:malamana. Adipalati, Godye sikemte bokotiyapo malamalalo halapo. ⁹ Epedeme Godtapo dia:ye sikemte ipo bokotiyapo malamuwapo. Ya:tapo Yami hatlopeye ta:lamo dla tulune duwapo, ditapo ya: tle pasakalo hallowe halepo depame. ¹⁰ Bokotiyapo malamolowe ikadepe kokoye ipapena. Ka:yapa dita Godye pomalamana, hao. Amasiyama Godta dia:ye sikemte bokotiyapo malamama Yami hatlopeye di watle hamiwapo, ya:tapo di batalimale asiyama halowedeme.

¹¹ Mikadepe dle so namkadulo, Godta dia:ye adipo sikemte bokotiyapo malamuwa, di ma ka:dena, epo bokotiyapo malamale mate diamkadulo asiyama bokotiyapo malama asiyama bokotiyapo malama demha:ha:loweye. ¹² Oplami haletapo Godye ponatina. Amasiyama dita ipo ya:mkale asiyama bokotiyapo malama asiyama bokotiyapo malama demha:ha:lepiye, eta Godye dia: dulu dla hallepe. Epalati ya:ta bokotiyapo malamaleta dia: dulu dla ma-ala:po hallepe.

¹³ Di dimalamana, dia:ye God dulu dla ha:ha:po. Epalati asiyama ya:tapo dia: dulu dla halapo. Epedeme di koko iye dimalamana, adipalati, ya:tapo ya: Hela:dle Sokoye di watle hamiwapo. ¹⁴ Epedeme A Godtapo Yamiye ta:lamo hema tulune duwapo, ya:tapo ta:la so pasakalo gadlalo hallepo depame. Epalati ditapo koko iye natipame atlam-siyamapo. ¹⁵ Epedeme oplami antapo Yesuye God Yami dlepiye, Godta ya: mate halapo. Epalati ya: mape God mate halapo. ¹⁶ Epedeme dimalamana, Godta adipo di bokotiyapo malamuwaye. Epapedeme di ya: dla mikadepe depame ya: dla hitaha:ha:po.

Godye bokotiyapo malamalalo halapo. Epedeme oplami antapo bokotiyapo malamale ya: dupa dulu dla elema:, ya:ye God mate hatlope depo hallati asiyama God mape ya: mate hatlope depo halapo. ¹⁷ Ditapo wowota:le pa:po itiyamale mate Godta koko gladlowe alila dla ha:ha:lepo depame ya:tapo bokotiyapo malamale kokoye dia: dulu dla ma-ala:po himiwapo. Adipalati, dia:ye Keliso some ta:lamo hema ha:ha:po. ¹⁸ Amasiyama di Godta di watle di batalimale asiyama hamilowe dla wowota:mha:ha:lepiye, ya:ta bokotiyapo malamaleye dia: dla ala po-ala:po halasema. Adipalati, bokotiyapo malamale dulu dla wota:le kokoye hawa. Epame bokotiyapo malamale kokotapo wota:le kokoye yumhalapo.

¹⁹ Dia: dla bokotiyapo malamaleye me-elapo. Adipalati, God tatle dia:ye bokotiyapo malamuwapo. ²⁰ Epedeme oplami haletapo atlemama, “Na: Godye sikemte malamde,” depame matle ya:mkaleye elle mate hallepiye, ya:ye isikimi mala-atlalo oplamipo. Adipalati, ipapele oplamitapo ya:mkale mikadepe dle oplami ya:ta natilaloye pobokotiyapo malamalalo hallepiye, ya: ma ya:ta ponatilalo wekele Godye adipo malapa? ²¹ Molo atlale yu iye Kelisota di watle hamiwapo. Oplami

antapo Godye sikemte malahallepiye, ya: ma ka:dena, ya:mkale mikadepe dle oplamiye sikemte bokotiyapo malamhallepe.

5

Mikadepe dle kokotapo ta:lamo koko itiyamaleye tla:mtelepe

¹ Epedeme oplami antapo Yesuye Godta sale Keliso dlepiye, ya:ye God yamipo. Epame oplami antapo Aye sikemte malahallepiye, ya: mape A Yamiye sikemte malahalapo. ² Di God sikemte malaha:ha:mama ya:ta molo atlale yu dla salladepo siyamelepiye, eta dita God ya: akimlala dla bokotiyapo malaha:ha: kokoye nati-imama apelepe. ³ Adipalati, God sikemte malamolowe ya: dulu kokoye ipo. Ditapo ya:ta molo atlale yu dla salladepo siyamelepe. Epedeme ya:ta molo atlale yuye dia: dla pase upiyena. ⁴ Epedeme God ya: akimlalatapo yia:ta mikadepe dle tle ta:lamo kokota itiyamaleye ma-tla:mtame ha:ha:po. ⁵ Epapedeme oplami antapo ta:lamo kokota itiyamaleye tla:mtapa:? Eye oplami antapo Yesuye God yami demhalema:, epapele oplamitapo ta:lamo kokota itiyamaleye ma-tla:mtame halapo.

Halepo halepo hallowe pasakaloye Yesu dla elapo

⁶ Yesuye ta:lamo dla puame yú tuluwapo. Epame polowe dla ya: omali olostauwapo. Epapedeme Yesuta ta:lamo hema puwaye hatlo yú tulluwedeme popuana. Amasiyama yú tulupame omali olostlowedeme puwapo. Epalati Hela:dle Sokotapo koko hema di watle ikadepe koko atlapo. Adipalati, Hela:dle Sokota isikimi ikadepe koko tlo atlamhalapo.

⁷ Dapahatlope koko iwolotapo Keliso koko dla imapo.

⁸ Eye Hela:dle Soko mate epo yú tulli koko mate epo

omali olostale koko mateta di watle Keliso kokoye botomastapo. Epammama dulu edla haleta koko hale meyelo po-imasema. ⁹ Di solotamdepo, opa opita yia:ta tlamale kokoye di watle atlamalati dalepame mikadepe dlowedeme. Epapele dulu dla ka:dena, Godta di watle atlamhala koko tlo sikemte kikitilata hamoloweye. Adipalati, ya:tapo di watle Yami koko dla ikadepe koko atluwapo. ¹⁰ Epedeme opa anawolotapo God Yami dla mikadepe depo ha:ha:ma:, Godtapo Yami koko dla ikadepe atlale yuta yia: dupa dulu dla elapo. Amasiyama opa anawolotapo Godta Yami koko dla ikadepe atlale yu dla pomikadepe dlalo ha:ha:ma:, yia:tapo Godye isikimi mala-atlalo oplami demha:ha:po. ¹¹ Epedeme Godtapo di watle Yami koko dla ikadepe atluwa yuye ipo. Godtapo di watle halepo halepo hallowe pasakaloye hamiwapo. Pasakalo eye Yami dulu dla elapo. ¹² Epedeme oplami antapo Yami Yesuye ma-hamuwa, ya: dla pasakalo eye me-elapo. Amasiyama oplami antapo God Yamiye pohamalalo wekuwa, ya: dla halepo halepo hallowe pasakaloye pe-elasema.

Yonta mosukulu yu atlale

¹³ Epedeme na: God Yami dla mikadepe dle so wua: watle yu ilimale iye hamima, wua:tapo halepo halepo hallalo pasakalo hauwa kokoye malamelepo depame. ¹⁴ Epedeme di ikadepe dema, dita inoma sumale dulu dla dita solotamale kokoye ya:ta solotamale mate ala:po atlepiye, ya: di yu dallepe. ¹⁵ Epele dulu dla ya:ta di inoma sumale yuye alila hapuloma dalemhalema dlepiye, di dimalamana, dita apa kokoye ya: dla dalla natilipiye, ya:ta alisisi eye di watle ma-hamimdepo.

¹⁶ Epame oplami antapo ya:mkale mikadepe dle oplamiye popolowe dla semtullalo batalimale koko

hamhallati natilipiye, ka:dena, ya:tapo oplami e yilo inoma sumale yu himilipe, Godta ya: pasakalo gadlepo depame. Epapedeme na:ta atla koko iye oplamiye popolowe dla semtullalo batalimale koko tlo atlema. Amasiyama polowe dla semtullalo batalimale kokoye melapo. Epedeme na:ta atla kokoye polowe dla semtullalo batalimale koko halalo oplami yilo inoma sumelepo depo po-atlasema. ¹⁷ Epapele dulu dla dimalamana, poka:ka:dle koko hapulomaye batalimalepo. Amasiyama epapele tlope oplami popolowe dla semtullalo batalimale koko ma me-hutiyepo.

¹⁸ Epedeme dimalamana, oplami antapo God yami depo halema:, ya: matle batalimale koko dulu dla posela:lowa. Adipalati, God Yamitapo ya:ye woloma omhalapo. Epalati batalimale oplami Saitentapo ya:ye pobatalimolowa.

¹⁹ Epame di dimalamana, dia:ye God ya: akimlalapo. Amasiyama ta:lamo pato iye Saitenta omhalapo.

²⁰ Epame di ma dimalamana, God Yamitapo mopuwapo. Epame ya:tapo di watle ka:depo malamaleye ma-hamiwapo, ditapo ikadepe God koko tlo malastlepo depame. Epedeme ditapo ikadepe God mate epo Yami Keliso mate hatlope depo ha:ha:po. Epedeme Yesuye ikadepe Godpo. Epapedeme ya: dla halepo halepo hallowe pasakalo kokoye elapo.

²¹ Epedeme na: mamadulo namkadulo, wua: wuskamu woloma omha:ha:mama biskapa god dla mikadepe dlalimiya.

Ka:dle Yu
Genesis, Exodus, Jonah, and the New Testament in the Kamula
language of Papua New Guinea
Buk Stat, Kisim Bek, Jona, na Nupela Testamen long tokples
Kamula long Niugini

Copyright © 2005 The Bible Society of Papua New Guinea

Language: Kamula

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 22 Sep 2022 from source files dated 9 Oct 2020

74ad7974-9dcd-5470-9c22-0eda5fbabe15